

IOANNIS KEPLERI

Mathematici Cæsarei *auth. x. i. Sam. n. a. l. i.*

DISSERTATIO *o. h. a. s. de
m. i. s. s. u. m.*

Cum

NUNCIO SIDERE O.

nuper ad mortales misso

24.065

à

GALILÆO GALILÆO.

Mathematico Patavino.

Alcinous.

Δείδ' ἐλευθέριον εἶναι τῇ γνώμῃ τὴν μέλλουσα φιλοσοφῆν.

Cum Privilegio Imperatorio,

P R A G Æ,

TYPIS DANIELIS SEDESANI.

Anno Domini, M. DC. X.

0 1 2 3 4 5 6 7 8 9

053110 021112

1870

1870

ILLVSTRISSIMO & REVEREN-
DISSIMO DOMINO, D.


I V L I A N O M E D I C E S,
SERENISS: MAGNI HETRVRÆ DVCIS

A P V D S^m C^m M^{mem}

O R A T O R I,

Domino meo Colendissimo.

ILLVSTRISSIME DOMINE,
Epistolam hanc meam ad Galilaum Gali-
laum, Professore^m Mathematicum in ce-
leberrima Academia Patavina, de Nun-
cio eius Sidereo perscriptam, & iam typis descriptam,
cui potius inscribam, quàm Ill^{ae} Di^{ae} T^{ae} non invenio.
Tu enim exaranda illius author mihi fuisti, primùm
transmisso ad me V I. Idus Aprilis, per Thomam Se-
gethum exemplari Nuncij siderei; & die mihi dicto ad
Idus, quo Te convenirem: pòst ut comparui, pralectâ
mihi, ex literis ad Te, Galilai postulacione, tuaq; ad-
iunctâ cohortacione; quâ perceptâ, & promisi me intra
diem, quo solent abire cursores, exaraturum aliquid,
& praestiti. Sed & nuper admodum à me, cùm obvi-
um habuisses, diligenter petisti, ut exemplum epistolae,
si quod retinuisssem, Tibi concederem legendum: ipsam
A^a ij quippe



quippe epistolam, quamvis apertam exhibuissem, per
 occupationes illius diei, non potuisse cognoscere: quod
 rursum promisi me facturum, primum atq; ad mundū
 descripsissem. Concepi autem illam initio, & iam typis
 expressi, tantò libentius; quòd & Galileus, ad quem illa
 destinabatur, MEDICEORVM Cliens esset; & ME-
 DICEI Principis, Magni Hetruria Ducis Legatus, ipse
 quoq; Gente MEDICEVS, hoc à me peteret: & deni-
 que materia, de qua scribendum erat, esset eiusmodi,
 quā (siquidem vera traderentur) MEDICEI nomi-
 nis honos, authoris consilio comprehenderetur.

Accipe igitur, Illustrissè Dè ex privatâ & Galilæi
 propriâ, publicam descriptione factam, publicâ dicatio-
 ne iam Tuam: exq; hac dedicatione Studium meum in
 veritate &, quod hac sola nilitur, MEDICEI Prin-
 cipatus decore, post Galileum authorem, asserendo, co-
 gnosce; meumq; erga Illustriss: D.T. animum ad obse-
 quia paratissimum æstima: Denique me inter Clie-
 tes tuos numera. Vale. V. Nonas Maias. Anno
 Christi Domini, M. DC. X.

Illustrissè Di T^a

ad obsequia deuotns,

IOANNES KEPLERVS
 S. C. M^{ris} Mathematicus.

A D L E C T O R E M
A D M O N I T I O.


CVM multi sententiam meam super Galilaei nuncio siderio expeterent; satisfacere placuit omnibus hoc opera compendio; ut Epistolam ad Galilaeum missam (magna quidem festinatione inter occupationes necessarias, intra praescriptum diem fusam) publicis typis exscriberem.

Atqui amici eam excusam monuerunt, videri paulum conceptam insolentius. Alius enim ablatum cupiebat exordium: quidam mitigata voluisset verba nonnulla, quae sententiis à Scholarum consuetudine recedentes Antagonistae tribuere, videri possint improvidis: non nemo parcius etiamnum laudatum Galilaeum desiderabat; ut locus relinqueretur sententiae clarissimorum virorum, quos diversum à me sentire audiant.

Itaque consilium hoc inij, ut monerem Lectorem; Suum cuique pulchrum: plerisque contendendo excandescere; mihi gratius disputationum videri condimentum, hilaritatem: Alij gravitate asseverationum dignitatem affectant in tradendam philosophiam, sunt tamen & ipsi saepe praeter institutum ridiculi; Ego ad id natura factus videor, ut laborem & difficultatem doctrinae, remissione animi, stylo expressam, temperem.

Quod igitur exordium attinet, meminerit Lector, id ad eum perscriptum esse, quem consentaneum sit legisse praefationem meam super Commentaria Martis, nuper edita, quae & allegata videt. Lusus enim seu iocus militaris, quo sum usus in opere illo publico, derivatus est in hoc etiam exordium privatae epistolae iure non deteriori.

Ad alteram censuram eadem est responsio; fingo animi gratiam inter disputantes litem, rixas, victoris triumphum, minas atroces: penam victi, ruborem, vincula, carceres, exilium: quae serium quid pollicentur, ac si uterque super suam sententiam, veluti super aris & focis depugnet. Atqui non est opus moneri Academicos (ceteri saltem cogitent) quid sit Positionem suam custodire: quod dum facit alter; non tantum vera & recepta, sed etiam absurda, falsa (imò in scholis saepe etiam impia, pernicio-fa, blasphema) pro suis usurpat; eaque, ut fert dicendi occasio, vel sibi videri, vel se credere, se statuere, se probare, vel probaturum profitetur, cum



secum nihil minus credat: tantum ut exercitatum reddat alterum in defendenda veritate. Adeoque maior est festivitas contentioni; si simplicior aliquis de veritate, velut de statu suo, contrarij improvisa assertione deturbetur, iubeaturque defendere, quod defensionis egere nunquam cogitaverat.


Quod tertium caput obiectionis attinet; equidem fucati nihil de Galileo scripsi. Semper hunc morem tenui, ut quæ bene ab alijs dicta putarem, collaudarem; quæ male, refellerem; nunquam contemptor aut dissimulato alienæ scientiæ, ubi propriâ caruissem: nunquam vel servus aliorum, vel mei negligens; si quid proprio Marte invenissem melius, aut prior.

Neque puto, tantum de me Germano, Galilæum Italum esse merum; ut ei vicissim adulandum fuerit, in veritatis, aut penitissimæ meæ sententiæ præiudicium.

Nemo tamen existimet, me, hac meâ libertate assentiendi Galileo, dissentiendi ab ipso libertatem alijs creptum ire; Salvo cuiusque iudicio illud laudavi. Quinimò si qua hic etiam propria dogmata suscepi defendenda; quamvis id veritatis opinione, serioque animo feci: non tamen

gratim eadem me polliceor abiecturum, primum atque mihi doctiorum aliquis errorem legitimam methodo demonstraverit.





Nobili & Excellentissimo Domino,

G A L I L Æ O G A L I L Æ O,

Patricio Florentino, Professori Matheseos

in Gymnasio Patavino

IOANNES KEPLERVS,

S. C. M^{is} Mathematicus

S. P. D.



AM PRIDEM DOMI MEAE CONSE-
deram ociosus, nihil nisi te cogitans, Galileæ præ-
stantissime, tuasq; literas. Emissio enim superio-
ribus nundinis in publicum libro meo, Commē-
taria de Motibus Martis, inscripto, multorum annorū labo-
re: exq; eo tempore, quasi qui difficilima expeditione belli-
cā gloriæ satis peperissem, vacatione nonnulla studiis meis
interpositā, fore putabam, vt inter cæteros & Galilaus, ma-
ximè omnium idoneus, mecum de novo Astronomiæ seu
Phylicæ cœlestis genere promulgato per literas conferret;
intermissumq; ab annis duodecim institutum resumieret.

Ecce verò tibi ex inopinato circa Idus Marrias, Celerum
operā nunciatum in Germaniam, Galilæi mei, pro lectione
alieni libri occupationem propriam insolentissimi argumē-
ti, de quatuor Planetis antea incognitis (ut cætera libelli ca-
pita præteream) usu perspicilli duplicati inventis: quod cum
Illustri S. C. M^{is} Cōsiliarius, & Sacri Imperialis Consistorij
Referendarius: D' Ioan: Matthæus VVackheri⁹ à VVakhē-
felsz, de curru mihi ante habitationē meam nunciasset; tāta
me incessit admiratio, absurdissimi acroamatis cōsideratio-
ne, tāti orti animorū motus (quippe ex inopinato decisā an-
tiquā inter nos liticula) ut ille gaudio, ego rubore, risu uterq;

B

obno-

ob novitatem confusi, ille narrando ego audiendo vix sufficeremus. Augebat stuporem meum, VVackherij adseveratio; viros esse clarissimos, doctrina, gravitate, constantia, supra popularem vanitatem longissimè erectos, qui hæc de Galilæo perscribant: adeoq; iam librum sub prælo versari, proximisq; cursibus affuturum.

Me, ut primùm ab ore VVackherij discessi, Galilæi potissimùm movit autoritas, iudicij rectitudine, ingenijq; solertiâ parata. Itaq; meditatus mecū sum, quî possit aliqua fieri accessio ad Planetarū numerum, salvo meo mysterio cosmographico, qđ ante annos tredecim in lucē dedi: in quo quinque illę Euclidis figure, quas Proclus ex Pythagora et Platōne Cosmicas appellat, Planetas circa Solē nō plures sex admittūt.

Apparet autem ex præfatione illius libri, & me tunc quævisse plures circa Solem Planetas, sed frustra.

Quod igitur hæc perpendenti incidebat, curriculum ad VVackherium detuli: nimirū uti terra, unus ex Planetis (Copernico) Lunā suam habeat, extra ordinē sese circūcurritatē; sic fieri sanè posse, ut Galilæo quatuor aliæ Lunæ minutissimæ, angustissimis meatibus circa Saturni, Iovis, Martis & Veneris corpuscula circumvolvi videantur: Mercuriū verò, circumsolarium ultimū, tam esse immersum in Solis radios, ut in eo nihil adhuc simile potuerit à Galilæo deprehendi.

VVackherio contrā visum, haud dubiè circa fixarum aliquas circumire novos hos planetas, (quale quid iam à multo tempore mihi ex Cardinalis Cusani & Iordani Bruni speculationibus obiecerat:) ac, si quatuor ibi latuerint hætenus Planetæ, quid igitur impedire, quin credamus, innumerabiles porrò alios ibidem, hoc initio factō detectum iri: adeoq; vel mūdum hunc ipsum infinitum, ut Mēlisso & Philosophiæ Magneticæ authori Gulielmo Gilberto Anglo placuit; vel ut Democrito & Leucippo, & ex recētioribus Bruno, &

no & Brutio, tuo Galilæe & meo amico, visum, infinitos alios mundos, (vel, ut Brunus, terras) huius nostri similes esse.

Sic mihi sic illi visum, interim dum librum Galilæi, ut erat spes facta, cupidine mira legendi expectamus.

Primum exemplum concessu Cæsaris mihi contigit inspicere, cursumq; pervolare: Video magna lōgeq; admirabilissima spectacula, *proposita Philosophis & Astronomis*, ni fallor & mihi; video ad magnarum contemplationum exordia omnes veræ Philosophiæ cupidos convocari.

Iam tum gestiebat mihi animus, me rebus inferre, quippe provocatum, & qui eadem de materia ante annos sex scripsissem; tecumq; Galilæe solertissime, de tam inexhaustis Iovæ conditoris thesauris, quorum alios post alios nobis aperit, iacundissimo scriptionis genere conferre. Quem enim tacere sinunt tantarum rerum nuncij? Quem non implet diuini amoris abundantia, per linguam & calamus se, se profundens vbertissimè?

Addebant animum Augustissimi Cæsaris Rudolphi imperia: qui meum de hac materia iudicium expetebat. De VVackherio verò quid dicam? Ad quem ut veni sine libro, lectionem tamen eius professus: invisum mihi, rixatum etiam fuit; deniq; planè conclusum, ut in hac materiâ non differrem fieri quàm disertissimus.

Dum aliquid meditor: superueniūt literę tuæ ad Illustriss. Magni Hetrurię Ducis Legatū, plenę tui in me amoris, ut qui hoc mihi honoris impertitus sis; ut per tantum virum potissimum me & transmissō exemplari, & addita commonestione, provocandum ad scribendum censueris; quod & prestitit in tui gratiam perquàm humaniter, & me in clientellam suam suscepit benevolentissimè.

Quod igitur mihi propriâ animi propensione; quod amicis placet; quod diligenter ipse rogas; id faciam: non nul-

la spe inductus, me hac epistola id tibi profuturum, si eam censueris ostendendam; ut contra morosos novitatum censores, quibus incredibile quicquid incognitum; profanum & nefandum, quicquid ultra consuetas Aristotelicæ angustię metas, uno proaspiste sis processurus instructior.

Temerarius fortè videri possim, qui tuis assertionibus, nullâ propriâ experientiâ suffultus tam facilè credam? At quî non credam Mathematico doctissimo, cuius vel stilus iudicij rectitudinem arguit, qui tantùm abest ut sese vanitati dedat, seseq; vidisse dicat quæ non viderit, popularem auram captans; ut vel receptissimis opinionibus, veritatis amore non dubitet repugnare, vulgîq; vituperia susq; deq; ferre? Quid quod publicè scribit, probrumq; si quod committeretur, clam habere nequaquam posset? Egone ut Patricio Florentino fidem derogem de iis quæ vidit? perspicaci lusciosus? instrumētis ocularibus instructo, ipse nudus & ab hac supellectili inops? Ego non credam omnes ad eadem spectacula invitanti; & quod caput est, vel ipsum suum instrumentum, ad faciendam fidem oculis, offerenti?

An parum hoc fuerit, Magnorum Hetruriæ Ducum familiam ludificari, Medicumq; nomen figmentis suis præfigere, planetas interim veros pollicentem?

Quid quod propriis experimentis, quod & aliorum asservationibus, in parte libri deprehendo ueracissimum? Quid causæ sit, cur solùm de quatuor planetis deludendum sibi putauerit orbem?

Tres sunt menses cùm Augustissimus Imperator super lunæ maculis varia ex me quæsiuit, in ea constitutus opinione; Terrarum & continentium simulachra in luna ceu in speculo resplendescere. Allegabat hoc potissimum, sibi videri expressam

pressam Italię cum duabus adiacentibus insulis effigiem: Specillum etiam suum ad eadem contemplanda offerebat in dies sequentes, quod omissum tamen est. Ad eodẽ eodem tempore Galilęe, Christi Domini patriam vocabulo pręferens, Christiani orbis Monarcham (eiusdem irrequieti spiritus instinctu, qui naturam detectum ibat) deliciis tuis æmulatus es.

Sed & antiquissima est hæc de maculis lunę narratio, fulgenti authoritate Pythagorę & Plutarchi summj philosophi, & qui, si hoc ad rem facit, Procōsulari imperio Epirũ tenuit sub Cæsaribus. Vt Mæstlinum adeoq; & mea optica ante annos sex edita præteream, inq; suum locum inferiũs differam.

Hęc igitur cũ consentientibus testimoniis etiam alij de Lunę corpore asseverent, consentanea iis quę tu de eodem longẽ dilucidissima affers experimenta: tantũ abest, ut fidẽ tibi in reliquo libro & de quatuor circum-Iovialibus planetis derogem; ut potiũs optem mihi in parato iam esse perspicillum, quo te in deprehendendis circum-Martialibus (ut mihi proportio videtur requirere) duobus, & circum-Saturniis sex vel octo prævertam, uno forsan & altero circum-Venerio & circum-Mercuriali accessũro.

Quam ad venaturam, quod Martem attinet, tempus erit maxime idoneum October venturus, qui Martem in opposito Solis exhibet; terris (præterquam anno 1608.) omnium proximum, errore calculi trium amplius graduum.

Age igitur, ut de rebus certissimis, meisq; oculis, ut omnino spero, videndis, tecum Galilęe sermonem conferam; tui quidem libri methodum secuturus, omnes verò Philosophiæ partes, quę vel ex hoc tuo nuncio ruinam minantur, vel confirmantur, vel explicantur iuxta pervagatus; ut nihil supersit, quod lectorem Philosophiæ dedutum

suspenſum teneat; & vel à fide tibi perhibenda prohibeat, vel ad contemnendam quæ hæcenus erat in precio, Philoſophiam impellat.

Primum libelli tui caput in fabrica perſpicilli verſatur, tantæ quidem efficaciæ, ut rem ſpectanti millies exhibeat maiori planitie, quod tum fit, ſi diameter tricies bis præſentetur longior. Quod ſi facultas æſtimatoria manet in ſententiâ conſuetæ magnitudinis; neceſſe eſt ei tunc rem videri tricies bis propiorem. Diſtantiã enim oculus non videt ſed coniicit, ut docent optici. Da enim hominem aliquem abeſſe tribus millibus & ducentis paſſibus, videri verò ſub angulo tricies bis maiori, quàm videtur alius ſine perſpicillo centum paſſibus abſens: cùm certum habeat oculus, hominem illum remotum, habere conſuetam magnitudinem, cenſebit non pluribus centum abeſſe paſſibus, adjuvante & clarificatione viſionis, perſpicillo procuratâ.

Incredibile multis videtur epichirema tam efficaciſ perſpicilli, at impoſſibile aut novum nequaquam eſt; nec nuper à Belgis prodit, ſed tot iam annis antea proditum à Io: Baptiſta Porta, Magiæ naturalis libro XVII. Cap: X. de Cryſtallinæ lentis affectibus. Vtque appareat, ne compoſitionem quidem cavæ & convexæ lentis eſſe novam; age verba Portæ producamus. Sic ille:

Poſito oculo in centro, retrò lentem, quæ remota fuerint, aded propinqua videbis, vt quaſi manu ea tangere videaris, ut valde remotos cognoſcas amicos: Literas epiſtola in debita diſtantiã collocata, aded magnas videbis, ut perſpicue legas: ſi lentem inclinabis, ut per obliquum epiſtolam inſpicias, literas ſatis maiuſculas videbis, ut etiam per viginti paſſus remotas legas: & ſi lentes multiplicare noveris, non vereor quin per centum paſſus minimam literam conſpiceris, vt ex vna in alteram maiores reddantur characteres. Debilis viſus ex viſus qualitate ſpecillis utatur. Qui id recte ſciuerit accommodare; non parvum nanciſcetur ſecretum.

cretum. *Concava* lentes, quæ longè sunt, clarissimè cernere faciunt, *convexa* propinqua, unde ex visus commoditate his frui poteris. *Concavo* longè parva vides sed perspicua, *convexo* propinqua maiora, sed turbida: Si utrumque rectè componere noveris, & longinqua & proxima maiora & clara videbis. Non parum multis amicis auxilij præstitimus; qui & longinqua obsoleta, proxima turbida conspiciebant, ut omnia perfectissimè contuerentur. Hæc Capite X.

Capite XI. nouum titulū facit de specillis, quibus supra omnē cogitatum lōgissimè quis cōspicere queat: sed demonstrationē de industria (quod & pfitetur) sic involvit, ut nescias quid dicat, an de lētibz plucidis agat, ut hactenus, an verò speculū adiungat opacū leuigatum: cuius modi unū & ipse in animo habeo, quod res remotas, nullo discrimine absentię, in maximā quantitate, ideoq; ut propinquas, & præterea proportionaliter auctas exhibet; tanta claritate, quanta ex speculo (quod necessariò coloris fusci est) sperari potest.

Huic loco libri Portæ, cū viderem præfixam querelam initio Capitis X. *Cavarum & convexarum lentium, & specillorum*. tantopere humanis vsibus necessariorum, neque effectum neq; rationes adhuc à nemine allatas: eam operā sumpsi ante annos sex in astronomiæ parte Optica; ut quid in simplicibus perspicillis accideret luculenta demonstratione geometrica redderem expeditum.

Videre est ibi Capite V. vbi demonstro illa quæ pertinet ad modum videndi, fol: 202. coniunctas in schemate effigies cavi & convexi perspicilli, planè ad eum modum, quo solent hodie in vulgatis tubis inter se iungi. Quod si non lectio Magiæ Portæ, occasionem dedit huic machinamento, aut si non aliquis Belgarum ex ipsius Portæ instructione fabrefactum instrumentum, solutis silentij legibus morte Portæ, multiplicauit in plura exempla, ut mercem venalem faceret: hæc certè effigies ipsa fol: 202. libri mei potuit curiosum lecto-

lectorem admonere de structura, præsertim si lectionem demonstrationum mearum cum textu Portæ coniunxit.

Non est tamen incredibile, sollertes sculptores in gente industria, qui perspicillis ad sculpturæ minutias videndas utuntur, casu etiam in fabricam hanc incidisse; dum lentes convexas cavis variè associât, ut quæ combinatio melius scribiat oculis, eam eligant.

Non ista dico ad deprimendam inventoris mechanici laudem, quisquis fuit: Scio quantum intersit inter rationales coniecturas, & ocularem experientiam; inter Ptolemæi disputationem de Antipodibus, & Columbi detestationem novi orbis: adeoq; & inter ipsos vulgo circumlatos tubos bilentes; & inter tuam Galilææ machinam, qua cælum ipsum terebrasti: sed nitor hic fidem incredulis facere instrumēti tui.

Fatendum est, me ex eo tempore, quo Optica sum aggreßus, creberrimè à Cæsare rogatum de Portæ superscriptis artificiis, fidem iis ut plurimum derogasse. Nec mirum, miscet enim manifestè incredibilia probabilibus: & titulus capituli XI. verbis: (*Supra omnem cogitatum quàm longissimè prospicere.*) videbatur absurditatem opticam involvere: quasi visio fiat emittendo, & perspicilla acuant oculi iaculos, ut ad remotiora penetrent, quàm si nulla perspicilla adhiberentur: aut si ut agnoscit Porta, visio fit recipiendo: quasi tunc specilla rebus videndis lucem concilient vel augeant; cum hoc potiùs verum sit, quæ non ultrò ad nostros oculos eiulantur aliquâ luculam, quâ mediante conspiciantur, nunquam illa ullo perspicillo detegi posse.

Præterea credebam non tantum aërem esse crassum & colore cæruleo, quo visibilium partes minutæ minus obtegerentur & confunderentur; quod cum per se certum sit, frustra videbam expectari à perspicillo, ut hanc aëris interfusi substantiam à visibilibus detergat: sed de ipsa etiâ cælesti essen-

ria tale aliquid suspicatus sum, quod nos, si maximè lunæ corpus in immensum augeamus, impedire possit, quod minùs exiguae eius particulas in sua puritate scorsim à cœlesti materia profundissima agnoscere possimus.

Has igitur ob causas abstinui à tentanda mechanica, concurrentibus insuper aliis etiam impedimentis.

At nunc merito tuo Galilæe solertissime commendo indefessam tuam industriam, qui diffidentia omni posthabita, rectâ te ad oculorum experimenta contulisti, iamq; orto per tua inventa veritatis sole, omnes istas titubationum larvas cum nocte matre dispulisti, quidq; fieri posset factò demonstrasti.

Te monstrante agnosco substantiæ cœlestis incredibilem tenuitatem, quæ quidem & ex opticis meis soli 127. pater, si proportionem densitatis aëris ad aquam conferas cum proportionem densitatis ætheris ad aërem, procul dubio multò maiori: quæ efficit, ut ne minutissima quidem stellati orbis (nedum lunaris corporis, stellarum humilimæ) particula nostros oculos effugiat, tuo instrumento instructos, multoq; plus materiæ (vel opacitatis) in uno specilli corpusculo interponatur inter oculum & rem visam, quàm in toto illo immenso ætheris tractu: quia ex illo aliquantula resultat obscuritas, ex hoc nulla: ut penè concedendum videatur, totum illud immensum spacium vacuum esse.

Et si igitur avidè tuum Galilæe instrumentum expecto: tamen si qua mihi fors affulgebit, ut mechanica remotis obstaculis tentare possim; strenuè me in iis exercebo, idq; gemina viâ. Nam vel multiplicabo lentes perfectarum sphaëricarum hinc inde superficierum, lenissimè assurgentium; easq; certis intervallis in arundine disponam, exteriores paulò latiores, ut tamen oculus intra terminum intersectionis parallelorum omnium lentium constitutatur; de quibus terminis vi-

de optica mea fol: 190. & fol: 440. vel ut in unica superficie errorem (si quis esset) facilius corrigere possim; unam solam lentem seu umbonem effigiabo, altera superficie proximè planâ, quippe in convexitatem sphericam solius dimidij gradus seu 34. minutorum assurgente; reliqua non sphericâ quæ ad oculum vergit, ne mihi contingat, quod fol: 194. ostendit Schema, fiatq; partium rei visæ distortio & confusio, de qua est prop: XVIII. fol: 193. sed in umbonem assurgente, ut est fol: 198. in schemate demonstratum, ut sit humori crystallino oculi similis; lineâ quippe hyperbolicâ tornatâ descriptâ, quam fol. 196. in schemate quæsi propter machinamenta Optica, ut est fol: 96. & fol: 100. scilicet ut non distorta fiat visio, sed partium rei visæ imagines augeantur proportionaliter; ut proposui fol: 105.

Hæc inquam in constituenda lente convexa observabo, ut maiora præstem visibilia: oculumq; non longè ab hoc puncto collocabo, in quod omnium rei visæ punctorum radij (quæ proprietas est huius umbonis hyperbolici) unicè confluant; hyperbola eousq; continuata crit, ut radius ex puncto seu centro hoc in contingentem extremum hyperboles, faciat angulum 27. ideoq; refractionem circiter 9. ut ad triginta semisses graduum habeam in utriusq; lateris refractione extrema; in intermediis proportionaliter minus.

Quia verò unius puncti de re lucēte tam remotâ radiationes, proximè parallelæ descendunt ad umbonem; post quem convergentes in humorem oculi crystallinum incidunt, adeò ut post crystallinum factâ refractione concurrant in puncto, proximè crystallinum, & ab eo se rursus dilatent, donec in retiformem veniāt iam dilatati instar penicilli, atq; ita pro punctis lunæ singulis, singulæ retiformis illustrantur superficies, adeò ut confusissima fiat visio; ideo ad oculum cuiuslibet spectantis peculiarem pro diversitate oculorum adhibe-

bo len-

bo lentem cavam, ut convergentes unius puncti radij, contrariâ refractione in cavo factâ, prohibeantur convergere; sed potius divergentes, & sic velut ab aliquo propinquo puncto venientes in crystallinum incidant, perq; cum refracti, in retiformi ipsa sortiantur sua collectionum puncta: quæ definitio est visionis distinctæ: quæ omnia demonstravi fol. 202. meæ Optices.

Atq; hæc de instrumento ipso; Iam quòd usum eius attinet, argutum sanè est inventum tuum, quomodo cognoscatur, quanta fiat rerum per instrumentum ampliatio, & quomodo singula in cœlo minuta minutorumq; partes dignosci possiat. Qua in re cùm in certamen veniat industria tua cū Tychonis Brahei in observando certitudine accuratissima; non abs re fuerit aliquid interloqui,

Memini cùm Polyhistor ille scientiarum omnium Io: Pistorius ex me quæreret, non unâ vice; num aded limatæ sint Braheanæ observationes, ut planè nihil in iis desiderari posse putem? valde me contendisse, ventum esse ad summum, nec relictum esse quicquam humanæ industriæ, cùm nec oculi maiorem ferant subtilitatem, nec refractionum negociû, siderum loca respectu horizontis statu movens: atq; hic illum contrâ constantissimè affirmasse; venturum olim, qui perspicillorum ope subtiliorem aperiat methodum: cui ego refractiones perspicillorum ut ineptas ad Observationum certitudinem, opposui. At nunc demum video, verum in parte vatem fuisse Pistorium. Ipse quidem Brahei Observationes per se stant, habentq; suam laudem. Nam quid sit in cœlo arcus 60. graduum; quid 34. minuta: hoc solis Brahei instrumentis innotescit. At ubi Braheus hoc pacto gradus cœlestes (vel etiam ego meo artificio Optico Lunæ diametrum) in cœlo fuerimus dimensi: iam superveniens tuum Galilææ perspicillum, & quantitatem illam à Braheo & à me

C ij

prodi-

proditam complectens, subtilissimè illam in minuta & minutorum partes subdividit; seseq; Brahei methodo observandi, elegantissimo coniugio associat; ut & Braheus ipse habeat, quo tuâ observationis methodo gaudeat, & tu tuam ex Braheana necessariò instruas.

Vis dicam quod sentio? Opto mihi tuum instrumentum in Eclipses lunaris contemplatione: sperarem ex eo præstantissima præsidia ad expoliendum; est ubi & reformandū, totum Hipparchum meum, seu demonstrationem intervallorum & magnitudinis trium corporum Solis, Lunæ & Terræ. Diametrorum enim Solis & Lunæ differentiam variabilem, digitosq; in Lunâ deficientes nemo exactius numerabit, nisi qui tuo instructus oculari, diligentiam in observando adhibuerit.

Stet igitur Galilæus iuxta Keplerum, ille Lunam observans, converso in cælum vultu, hic Solem, aversus in tabellam, (ne oculum urat specillum) suo uterq; artificio: & ex hac societate pdeat olim nitidissima intervallorū doctrina.

Quinetiam (præter Lunam) Mercurium ipsum in disco Solis hoc meo artificio vidi: vide libellum hac de re editū.

Nec minùs etiam, si Cometa quispiam effulserit, paralaxe eius (ut & Lunæ) ad stellulas illas minutissimas & creberrimas solo tuo instrumento conspicuas, collatæ, observari rectissimè poterunt: ex quibus de altitudine corporum illorum certius, quàm hactenus unquam, licebit argumētari.

Atque hæc tecum Galilææ, ad primum libelli tui caput, conferre libuit.

Transis secundo ad phænomena Lunaria præstantissima: quâ mentione refricas mihi memoriam eorum, quæ in Astronomiæ parte Optica Cap: VI. de luce siderum Numero 9. super maculis Lunæ, ex Plutarcho, Mæstlino, meisq; experimentis adduxi,

Ac initio perquam iucundum est, & meipsum in eiusdem lunæ maculis, non ut tu, converso, sed averso vultu observandis, esse versatum. Schema huius rei habes fol: 247. mei libri: ex quo illud patet, mihi quoq; limbum lunæ apparuisse lucidissimum undiq; solum corpus interius maculis fuisse distinctum.

Ex eo subit animū certare tecū in pervidendis illis minutis maculis, à te primum in parte lucidiore animadvertis. Id autē hoc pacto me spero perfecturum mea observandi ratione, vultu à Luna averso; si lunæ lumen per foramen in tabellam perticā circumlatam intromiserō, sic tamen, ut foramen obvallet lens crystallina, sphærico maximi circuli gibbo, & tabella ad locum collectionis radiorum accomoderetur. Sic in pertica 12. pedes longa, lunæ corpus perfectissimè depingetur quantitate monetæ argenteæ maioris. Artificium demonstravi prop: 23. fol: 196. & 211. libri mei; simplicius tamen fuit propositum à Porta primo titulo Cap: VI. de lente, cum ego de integro globo demonstraverim.

Pergamus Galilææ, tua excutere phænomena; Nam cum ætate lunæ auspicaris observata tua, primumq; ostendis, quid corniculatæ desit ad ovalis lineæ perfectionem. Ovalem esse speciem circuli illuminatorii demonstravi Numero 8. fol: 244. libri mei: tersè igitur & planè mathematicè loqueris.

In consideratione macularum à te primum animadvertarum in parte Lunæ lucida; omnino optice demonstras ex illa laminationis ratione, illas esse cavitates aliquas seu depressas lacunas in lunari corpore. Sed excitas disputationem quidnam sint illæ tā crebræ lunæ maculæ partis antiquitūs lucidæ putatæ. Tu eas cum vallibus comparas nostræ Telluris; & fateor esse nonnullas huiusmodi valles, præsertim in Styria provincia, specie quasi rotundas, faucibus angustissimis fluvium Muram recipientes supra, emittentes infra, ut sunt cā-

pi dicti Græcensis, Libnicensis, & ad Dravum Marpurgenſis, aliiq; per alias regiones, quos circum campos altissima conſurgunt montium iuga, ſpeciem aheni exprimentia; quippe non minima pars latitudinis camporum eſt altitudo circumieſtarum crepidinum. Equidem fateor, & tales in Luna valles eſſe poſſe, ſinuosis montium reſſibus propter fluvios excavatas. At quia addis tam crebras eſſe has maculas, ut aſſimilēt lucidam partem corporis lunaris caudæ pavonis, in varia ſpecula, velut oculos, diſtinctæ: ſubit igitur animū, num in Luna hæ maculæ quid aliud notent. Apud nos enim in Tellure ſunt ſinuosa nonnullæ valles, at ſunt etiam in longū protenſæ ſecundum fluviorum decurſus, profunditatis non contemnendæ: cuiuſmodi veluti perpetua vallis eſt Austria ferè tota, propter Danubium, inter Moraviæ & Styriæ montes depreſſa, & quaſi recondita. Cur igitur nullas tales longas in Luna maculas prodis? cur pleraq; circulo circumductas? Annē licet coniecturis indulgere, Lunam veluti pumicem quendam eſſe, creberrimis & maximis poris undiq; dehiſcentem? Patieris enim æquo animo, ut hic per occaſionem aliquid indulgeam ſpeculationibus meis, Commētario de Marte Cap: XXXIV. fol: 157. propoſitis: ubi ex eo quod Luna à Tellure duplo celerius inciratur, quàm partes ipſæ telluris extimæ in circulo æquatore; collegi, lunare corpus eſſe rarum admodum, quodq; exiguâ materiæ paucæ contumacia præditum, raptui Telluris non multum reſiſtat.

Verū tamen hæc (de abſolutis cauitatibus non per montes formatis) tanti non ſunt, ut ſi iuxta tuas ſequentes narrationes ſtare omnino nequeant, pertinaciter defendenda putem. Nam clariſſimis experientis lege planè optica reddiſti confirmatiſſimum, in lunari corpore multos per lucidā partem, præſertim inferiùs, conſurgere apices, in ſtar altiſſimorum montium noſtræ Telluris, qui primi orientis in Luna So-

na Solis luce fruuntur, eâque tibi perspicillo tuo utenti de-
teantur.

Quid iam dicam de tua super antiquis maculis Luna dis-
putatione exactissima? Cum sol: 25). libri mei sententiam
Plutarchi adduxissem, Lunæ maculas illas antiquas pro La-
tebus seu Maribus habentis, lucidas partes pro continenti-
bus: non dubitavi me opponere, & contrariâ ratione in ma-
culis continentes, in lucida puritate humoris vim ponere:
qua in re mihi VVackherius valde applaudere est solitus. A-
deoq; his disputationibus superiori æstate indulimus (credo
quod Natura per nos eadem moliebatur, quæ per Galilæum
obtinuit paulò post) ut in ipsius VVackherij gratiam, etiam
Astronomiam novam, quasi pro iis qui in Luna habitant, pla-
neq; Geographiam quandam Lunarem conderem: cuius in-
ter fundamenta & hoc erat; maculas esse continentes, luci-
das partes maria. Quid me moverit, ut hîc Plutareho con-
tradicerem, videre est sol: 251. libri mei, experimentum sci-
licet ibi allegatum, quod cepi in monte Styriæ Scheckel, ex
quo mihi subiectus fluvius videbatur lucidus, terræ tenebro-
siores. At infirmitatem applicationis folio verso margo
ipse indicat. Scilicet non luce communicata ex Sole ut Ter-
ræ, lucebat fluvius, sed luce repercussa ex aëre illuminato.
Propterea & causas experimenti tentavi infelicitè. Nam
contra doctrinam Aristotelis, libro de Coloribus, hoc affir-
mavi: aquas minus de atro participare, quàm terras,
Quî enim hoc verum esse possit, cum Terræ aquis tinctæ ni-
griores evadant? Et quid multis, da Lunam ex alba gleba
constare, ut Cretam insulam, (quomodo Lucianus Lunam
dixit Casei similem Terram esse) concedendum erit, clariùs
resplendescere illam ex illuminatione Solis, quàm maria,
quantumvis non atramento imbuta.

Itaq; nihil me liber meus impedit, quo minùs te audiam,

contra

contra me, pro Plutarcho, mathematicis argumentis differētem, illatione argutissima & invicta. Lucidæ quippe partes multis cauitatibus dehiscunt, lucidæ partes tortuosa linea illuminantur, lucidæ partes eminentias habent magnas, quibus vicinas partes prævertunt in illuminatione: eadem & contra Solem sunt lucidæ, parte à Sole aversâ tenebrosæ: quæ omnia in sicco & solido & eminenti locum habent, in liquido minimè. Contra tenebrosæ partes, notæ antiquitūs, sunt æquabiles; tenebrosæ partes tardè illuminantur, quod earum arguit humilitatem, cum circumstantes eminentes iam longè lateq; colluceant, & à tenebrosis illuminatis nigrore quodam, velut umbrâ distinguantur; linea illuminationis in parte tenebrosâ recta est, in quadris: quæ vicissim in humorem competunt, ima petentem, & pondere suo solum ad æquilibrium.

His inquam argumentis planè satisfecisti: do, maculas esse maria, do lucidas partes esse Terram.

Neq; hæc tua experimenta perspicacissima, vel meo ipsius testimonio carent. Nam fol: 248. Optices meæ, habes Lunæ bisectæ lineam tortuosam, ex quo eliciunt eminentias & depressiones in Lunæ corpore. Fol: 250. exhibeo Lunam in eclipsi, figura laniatæ carnis aut asseris confracti: striis lucidis sese in partem umbrosam insinuantibus: quæ observatione idem tecum, sed alio argumenti genere evinco, Lunæ partes inæquales esse, has eminentes, illas profundas; nō iam ex umbræ projectione, sed ex eo quòd debilitatum Solis radium in confinio Eclipsis, aliæ Lunæ partes fortius, aliæ debilius excipiunt & revibrant. At hæc confuse tantum & superficialiter à me annotata sunt, nulla distinctione maculorum partium à lucidis. Tua verò diligentia, quàm ordinatim omnia persequitur? Qui etiam maculas ipsas veteres albicantibus areolis æquabilibus, ceu maria planis insulis intermixtas exhibes.

Neq;

Neq; satis mirari possum quid sibi velit ingens illa, circuloq; rotundata cavitas, in sinistro; ut ego loqui solco, oris angulo: natura ne opus sit, an manus artificis. Nam profectò consentaneum est, si sunt in Luna viventes creaturæ (quâ in materiâ mihi post Pythagoram & Plutarchū iam olim Anno 1593. Tubingæ scripta disputatione, inde in Opticis meis fol: 250. & nuperrimè in supradicta Geographia Lunari ludere placuit) illas ingenium suæ provincie imitari, quæ multò maiores habet mōtes & valles quàm nostra tellus, ideoq; mole corporum maximâ præditas, immania etiam opera patrare: cumq; diem habeant quindecim nostros dies longam, æstusq; sentiant intolerabiles; & fortasse careant lapidibus ad munitiones contra Solem erigendas, at contrâ glebâ forsan habeant in modum argillæ tenacem; hanc igitur illis ædificandi rationem usitatam esse; ut campos ingentes deprimant, terra circulo egestâ & circumfusâ, fortè & humoris in profundo eliciendi causâ; ut ita in profundo, post tumulos egestos in umbra lateant, intusq; ad motum Solis & ipsi circumambulent unibrâ consecretantes; atq; hæc sit illis veluti quædam species urbis subterraneæ; domus, speluncæ creberrimæ, in crepidinem illam circularem incisæ; ager & pascua in medio, ut solem fugientes à prædiis tamen longiùs non cogantur recedere.

Sed sequamur porrò etiâ filum tuæ scriptiōis. Quæris, cur non inæqualis etiam appareat extremus Lunæ circulus? Nescio quàm id diligēter fueris contemplatus, anne potius hic ex opinione vulgi quæras? Nam libro meo fol: 249. & fol: 250. in pleniluniis aliquid sanè in hac extima circuli perfectione desiderare me professus sum. Perpende; & quid tibi videatur iterato enuncia; tuis enim ocularibus fidam.

Ad quæstionem tu quidem, ut de re certa respondes gemino modo. Primus meis experimentis non repugnat. Nam

si frequentia & constipatio verticum aliorum post alios in extremo aspectabilis hemisphærij limbo, speciem exhibet perfecti circuli, fieri non potest, nisi vertices ad tornum æquati & abradi sint; ut non minutulæ nonnullæ rimulæ aut tuberculi cōpareant; quod meis observariis esset cōsentaneū.

In altero modo Lunæ circūfundis Sphæram aëriam, quæ in devexa globi reducta, profunditatem aliquam radiis Solaribus & terrestribus, adeoq; & nostris oculis obiiciat; unde ille limbi merus & emaculatus splendor, tota interiori facie, quâ non ita profundè nostris obtutibus obstat hic aër, crebris maculis scatente.

Potuit te huius aëris Lunaris admonere liber meus fol: 252. & 302. quæ libri mei loca tuis hic experimentis egregiè confirmas. Sanè non video, quî Selenitæ illi in plenilunio, quod nos videmus (cæteri q; invisibilis hemisphærij in novilunio) quibus temporibus ipsis est meridies, immanes Solis æstus tolerare possint, si non aër turbidus Solem illis, ut fit apud Peruânos, crebrò tegat, æstumq; humore temperet; qui aër in plenilunio & maculas magis occultat, & splendorem ex Sole ingentem combibit adq; ad nos revibrat.

Quid tu de aëre dicis circa Lunam, cùm Mæstlinus libello Tubingæ edito anno 1606 etiam pluvias in ea conspexerit. Sic enim ille Th: 152.

In Eclipsi Lunari vespere Dominica Palmarum anni 1605 in corpore Lunæ versus Boream, nigricans quadam macula conspecta fuit, obscurior cætero toto corpore, quod candentis ferri figuram representabat. Dixisses nebula, in multam regionem extensa, pluviis & tempestuosis imbribus gravida; cuiusmodi ab excelsorum montium iugis in humiliora convallium loca, videre non rarò contingit. Hæc ille.

Ne verò putes antiquarum macularum unam fuisse; monstravit ipse mihi Mæstlinus anno superiori diagramma. Macula erat & situ & magnitudine differens: quippe quæ quarram

cuius

circiter aut quintam partem planiciei Lunaris occupabat; & præterea adeò atra, ut etiam in obtenebrata Luna cluceret.

Trădit eo libello à Th: 88. Lunæ affinitatem cum Terra, in densitate, umbra, caligine, luce à Sole mutuâtia; quæ globum utrumq; circumambulet, quæ æquales & Terricolis Lunæ phases exhibet, & Lunicolis Terræ, ut utrumq; corpus, ab altero æqualiter illuminetur, quo loco magnam partem complectitur meæ Astronomiæ Lunarîs. Alterum gradum cognationis horum corporum Th: 92. collocat in asperitate superficialium: quodq; notatu dignum est, ex tribus locis Averrois citat dictum Aristotelis ex libro de animalibus, quòd Luna terrena natura admodum sit affinis.

In specie de aëre circa Lunare corpus circumfuso à Th: 145. ex professo agit, cuius ista sunt verba Th: 149. tuis Galilæe verbis adeò similia, ut ex tuo libello desumpta videantur: *Si Luna corpus, inquit, quacunque phase probè intuearis, extremam oram multò limpidiori puriori q; luce claram, nec ullis maculis conspersam videbis: cum tamen ab interiori corpore plurimæ nigricantes notæ passim emicent. Quis hic dicet, uniformis illius lucis non esse aliud quàm huius obscurioris turbidi & maculati splendoris subiectum?* Concludit hinc corpus limbi esse perlucidum, quasi vitreum, aërium, homogeneum, deniq; aëris nostri circumterrestre planè simile.

Multus quidem est in eo, ut tecum Galilæe, hunc aërem ex eo etiam signo probet, quòd pars lumine Solis perfusa amplioris circumferentiæ apparet, quàm reliquum orbis tenebrosi: quod Mæstlinus multis probat experimentis, non nocturnis tantum, quarum causa in visum reici possit, sed & diurnis, quando stella Veneris se post Lunæ bifidæ partem umbrosam recipit. Verum pace vestra mihi liceat, ego & si aërem Lunę concedo, tamen super hoc experimento maneo in sententiâ: lumen hinc Lunæ, inde stellæ, de die etiam sese in oculo ampliare, locumq; partis tenebrosæ carpere, ut ea minuta, lucida magna putetur. Vide Optica mea fol: 217.

Sequitur in tuo libello fol: 13. ingeniosa & legitima demonstratio eius quod à me quoque fol: 250. passim dictum est, demonstratum verò minimè; Montes Lunares multò maiores esse terrenis; idq; non tantum in proportionem suorum globorum, quod ego dixeram: sed in comparatione simplici. Scilicet desiderabatur ad hoc demonstrandum, tuum perspicillum, tua in observando diligentia.

Nec minùs ingeniosè te fol: 14. comparas ad observationem disci Lunaris, cum ei primùm enascuntur cornua, docesq; cornua obiectu tecti tegere, ut reliquus discus emineat. Est hic mihi modus observandi usitatissimus.

Quod verò demonstrationem attinet, quæ ostendit hoc Lumen ex nostra Tellure effundi, ea iam à viginti annis eoq; amplius fuit penes Mæstlinum; ex cuius doctrina illam transfuli in meam Astronomiæ partem Opticam Cap: VI. num: 10. fol: 252. plenissimo tractatu: ubi easdem etiam opiniones, (quod lumen hoc sit à Sole, vel à Venere) tecum eodem modo refuto. nisi quod hanc ultimam merito suo, paulò quàm tu, molliùs excipio.

Putas fol: 15. ruborem illum Lunæ aheneum; quem circa extremitates umbræ terrenæ Luna eclipsata retinet, reliquo corpore fusca & evanida, esse ex illuminatione vicinæ substantiæ ætheriæ. Aduvas meam de eodem rubore disputationem fol: 27j. Opticorum: ubi eam ex refractis in nostro aëre Solis radiis deduco: & accommodas ea quæ fol: 30j adduxi, ad rationem dicendam, cur in totali Solis Eclipsi non semper nox fiat mera: quæ in libro de stella nova fol: 117. repetij. Dubito Galilææ, an possit hæc à te dicta causa huic sufficere rubori: hæc enim, uti vis aurora, Lunare corpus circumstat multò æquabiliùs, quàm ut rubor iste sic inæquabiliter in Lunam deriveretur, ut ostendunt mea fol: 276. allata experimenta: quæ ubi in tuo systemate mundi in considerationem ad-

nem adduxeris, spero te hac in parte tantò felicius de rerum causis disputaturum.

Ad pallorem tamen Lunæ in mediam umbram immersæ efficiendum, ubi cessant radij Solis refracti; facile patior, ut iuxta sidera Solem circumstantia, quibus ego fol: 277. pallores causam transcripsi, hæc tua aurora, ut potior causa adducatur.

Absolvi alterum libelli tui caput de Luna: transeo ad tertium de Sideribus cæteris.

Prima tua observatio est magnitudinis siderum, quorum corpuscula perspicillo inspecta, in proportionem ad Lunæ diametrum ais minui. Adducis & alia similia, quibus stellæ minuuntur; verissima, & mihi longo usu cõperta, crepusculum, diem, nubem, velum, vitrum coloratum.

Hic tuas exentio locutiones, *angulum visorium non à primario stellæ corpusculo, sed à latè circumfuso splendore terminari: item; perspicillo adscititios accidentales q̃ fulgores stellis adimi.*

Querere lubet ex te Galilæe, num acquiescas in causis à me allatis huius rei, ubi de modo visionis disputatione fol: 217. ac præsertim fol: 221. Opt. Nam si nihil desideras, licebit tibi porro propriè loqui; luminosa puncta conos fundere suos in crystallinum, & post eum refractione factâ eos rursus in punctum contrahere; quia verò id punctum non attingit retinâ, dilatatione nova superficieculam retinæ occupat, cum debuerit occupare punctum: itaq; perspicillorum opera fieri, ut alia refractione intercedente punctum illud in retiforme competat. Non igitur aliqui descendunt radij in oculum, à splendore stellis exterius circumfuso; sed contra qui descendunt ab ipso lucido corpore radij, ij vitio refractionum, & per noctem amplificatione foraminis uveæ, diffunduntur in splendorem in retiformi circa punctum, quod stellam debu-

it repræsentare, circumiectum. Neq; perspicillum in terra adimit aliquid stellis in cælo, sed adimit aliquid lucis retiformi quantum eius redundat.

Altera iucundissima tua observatio est figuræ fixarum radiosa, differentis à Planetarum figuris circularibus. Quid aliud inde Galilæe colligemus; quàm fixas lumina sua ab intus emittere, planetas opacos extrinsecus pingi: hoc est, ut Bruni verbis utar, illas esse Soles, hos Lunas seu Tellures.

Ne tamen is nos in suam pertrahat sententiam de mundis infinitis, totidem nempè, quot sunt fixæ, omnibus huius nostri similibus: subsidio nobis venit tertia tua observatio innumerabilis fixarum multitudinis supra eam quæ antiquitus est cognita; qui non dubitas pronunciare, videri stellarum supra decem millia. Quanto enim plures & confertiores, tantò verior est nra argumentatio, contra infinitatem mundi. libro de stella nova, Cap: XXI. fol: 104. proposita; quæ probat, hunc, in quo versamur homines, nostro cum Sole & Planetis, esse præcipuum mundi sinum; neq; fieri posse, ut ex ulla fixarum talis pateat in mundum prospectus, qualis ex nostra tellure vel etiam Sole patet. Locum brevitatis causa supersedeo describere; proderit ad fidem, totum perlegi.

Accedat auctarij loco & hæc argumentatio. Mihi, qui debili sum visu, sidus aliquod maiusculum; ut Canis, parùm cedere videtur magnitudine, diametro Lunæ, si radios fulgidos accenseam; at quæ sunt visu correctissimo, quiq; instrumentis utuntur astronomicis, quibus non imponunt hi cincinni ut oculo nudo, ij quantitates diametris stellarum suas describunt per minuta & minutorum partes. Quod si ex mille solum fixis nulla maior esset uno minuto; (sunt autem pleræq; ex numeratis maiores) ex coactæ omnes in vnam rotundam superficiem æquarent, (adeoque & superarent) diametrum Solis. Quanto magis stellarum decies millium disculi

sculi in unum conflati superabunt magnitudine aspectabili, speciem disci Solis? Si hoc verum, & si sunt illi Soles ex eodem genere: cum hoc nostro Sole, cur non etiam illi Soles universi superant splendore hunc nostrum Solem? Cur ad eò obscurum universi lumen fundunt in patentissima loca, ut Sol per foramen punctu aciculæ minimo apertum irradians in cameram conclusam, iam statim ipsam fixarum claritatē quanta esset totā camerā ablatā, infinito penè intervallo superet? Dices mihi, nimium illas à nobis distare? Nihil hoc iuvat hanc causam. Quantò enim distantes magis, tantò quàm Sol maiori diametro sunt vel singulæ. At interfusus æther fortasse obscurat illas? Nequaquam: cernimus enim illas suis eum scintillationibus, suo cum discrimine figurarū & bolorum: quod non esset, si densitas ætheris alicui obstaculo esset.

Satis igitur hinc clarum est, Corpus huius nostri Solis inestimabili mēsurā esse lucidius, quàm universas fixas, ac proinde, hunc nostrum mundum non esse è promiscuo grege infinitorum aliorum. Qua de re infra plura scribam.

Habes innumerabilitatis stellarum oculos testes plurimos. Rabinos aiunt numerare supra duodecim millia; novi religiosum, qui nocte quadam illi plures quadraginta numeravit in clypeo Orionis. Mæstlinus maiusculas in Pleiadibus ordinariè numerat, nisi fallor, quatuordecim, non infra magnitudinum terminos.

De Galaxia nubeculis & nebulosis Cōvolutionibus beati Astronomos & Physicos, detectā earū essentiā, & confirmatis, qui pridem hoc idem tecum asseverabant, nihil esse nisi congeriem stellarum confusis luminibus ob oculorum hebetudinem.

Itaq; desinent porro cometas & nova sidera cum Braheo

heo efformare ex via lactea: ne perfectorum & perennium mundi corporum interitum absurdè introducant.

Tandem ad novos Planetas tecum transeo: rem præcipuè admirationis in libello tuo; paucula tecum super eo negotio, præter ea quæ initio dicta, collocuturus.

Primum exulto, me tuis laboribus nonnihil recreari. Si circa unam fixarum discursitantes invenisses Planetas; iam erant mihi apud Bruni innumerabilitates parata vincula & carcer, imò potius exilium in illo infinito. Itaque magno in præsens me liberaſti metu, quem ad primam libri tui famam ex Opponentis mei triumpho conceperam; quod quatuor istos Planetas non circa unam fixarum, sed circa ſidus Iovis ais diſcurrere.

Ingens ſanè VVackherium Philoſophiæ illius horridæ de novo ceperat admiratio; quæ, quod nuperrimè Galilæus oculis ſuis perſpexiſſet, tot annis antea non tantum opinionibus introduxerat, ſed planè argumentationibus ſtabiliverat. Nec immeritò ſanè magni ſiunt, qui in cõſimilibus philoſophiæ partibus, ſenſum ratione prævertunt. Quis enim non maioris faciãt nobilitatem doctrinæ aſtronomicæ, quæ cùm pedem extra Græciam numquam extuliſſet, tamen Zonæ frigidæ proprietates prodidit: quàm vel Cæſaris experimentationem, qui clepſydris ad littus Britannicum noctes deprehendit, Romanis noctibus paulò breviores; vel Belgarum in Septemtrione hyemationem, ſtuporis quidem plenã, ſed quæ cõtra cognitionem doctrinæ illius fuiſſet impoſſibilis? Quis non celebrat Platonis fabulam de Atlantica, Plutarchi de inſulis auricoloribus Trãs-Thulaniſ, Senecæ de futura orbis novi detectione verſiculos fatidicos: poſtquã tale quid ab Argonauta illo Florentino tandem fuit præſtitũ? Ipſe Columbus, dubium tenet lectorem ſuum; plus is ingenium

nium admiretur, novum orbem ex ventorum flatu conii-
entis, an fortitudinē tentantis ignotos fluctus, immensumq;
Oceanum: & sælicitatem optatis potiti.

Scilicet in mea etiā materia erunt miraculo Pythagoras,
Plato, Euclides; quòd Rationis præstāria subiecti cōcluserūt,
aliter factum esse non posse, quā ut Deus Mundum ad
exemplar quinque regularium corporum exornaret; licet in
modo erraverint: vulgaris contra laus erit Copernici, qui
ingenio quidem usus non vulgari, descriptionem tamen
mundi quasi ocularem fecit, solum τὸ ἔτι in lucem effe-
rens; cedit longē Veteribus Keplerus, qui ex oculari intu-
itu Systematis Copernicani, quasi ἐκ τῆς οὐρᾶ ascendit ad
causas easdem adque τὸ διότι, quod Plato à priori desuper
tot antè sæculis prodiderat; ostenditq; in Systemate Mundi
Copernicano expressam esse rationem quinque corporū Pla-
tonicorum. Nec absurdum aut invidiosum hoc est, illos his
præferri; postulat id ipsa rei natura. Nam si maior est gloria
Architecti huius Mundi, quā contemplatoris Mundi, quā-
tumvis ingeniosi, quia ille rationes fabricæ ex seipso deprō-
psit, hic expressas in fabrica rationes vix magno labore agno-
scit: certè qui rerum causas, antequā res patent sensibus,
concipiunt ingenio, ij Architecti similiores sunt cæteris,
qui post rem visam cogitant de causis.

Itaq; non invidetis Galilæ nostris antecessoribus suam
hic laudem, qui quod nuperrimè tuis oculis deprehendisse
ais, sic esse oportere tibi tanto ante prædixerant. Tua nihi-
lominus gloria hæc erit, quod ut Copernicus, & ex eo Ego,
Veteribus errorem in modo demonstravimus, quo putabant
expressā esse in Mundo, quinque corpora; substituto modo ge-
nuino & verissimo; sic tu hanc Brutij nostri ex Bruno mutu-
atam doctrinam emendas, partim & dubiam reddis. Puta-
bant illi, circumiri etiam alia corpora suis Lunis, ut Tellus

nostra suâ: Verùm illos in genere dixisse demonstras: At putabant fixas stellas esse quæ sic circumirentur; causam etiã dixit Brunus cur esset necesse: Fixas quippe solaris & igneæ esse Naturæ, Planetas aqueæ; & fieri lege Naturæ inviolabili, ut diversa ista cõbinentur, neq; Sol Planetis, ignis aquâ suâ, neq; vicissim hæc illo carere possit. Hanc igitur illius rationẽ infirmã esse tua detegunt experimenta. Primùm esto ut fixa quælibet Sol sit, nullæ illas Lunæ hucusq; circumcursitare visæ sunt: Hoc igitur in incerto manebit, quoad aliquis subtilitate observãdi mira instructus, & hoc detexerit: quod quidem hic successus tuus, iudicio quorundam nobis minatur. Iupiter contra planetarum est unus, quos Brunus tellures esse dicit; & ecce quatuor alios circa illum Planetas: at hoc Telluribus non vindicabat Bruni ratio, sed Solibus.

Interim temperare non possum; quin Paradoxos illos ex tuis inventis etiã hæc in parte juvem; moneamq; veri non absumile, non tantùm in Luna, sed etiã in Iove ipso incolæ esse; aut (quod nuperrimo congressu quorundam philosophantium, jucundè motum) detegi nunc primùm regiones illas; Colonos verò, primùm atq; quis artem volandi docuerit, ex nostra hominum gente non defuturos. Quis credidisset olim, tranquilliorẽ & tutiorem esse navigationem vastissimi Oceani, quàm angustissimi sinus Adriatici, maris Balthici, freti Anglicani? Da naves, aut vela cælesti auræ accommoda, erunt qui ne ab illa quidem vastitate sibi metuât. Adeoq; quasi propediem affuturis, qui hoc iter tentent, Ego Lunarem, tu Galilææ Iovialem condamus Astronomiam.

Hæc iucundè sint interposita, miraculo audaciæ humanæ, quæ in huius potissimùm sæculi hominibus sese effert. Non sunt enim mihi deridiculo veneranda sacra historię mysteria.

Neq; tamen etiã vile operæ preciũ duxi, obiter aurẽ velli-
care altiori Philosophiæ, cogitet an quicquã frustra pmittat

Gentis

Gentis humanæ supremus & providus ille custos; & quoniam ille consilio veluti prudens promus hoc potissimum tempore nobis isthæc operum suorum penetralia pandat: quod cogerit noster Thomas Segethus, multiplici vir eruditione, movit; aut si, quod ego respondi, Deus conditor, universitatem hominum veluti quendam succrescentem, & paulatim maturescendentem puerulum, successivè ab aliis ad alia cognoscenda ducit; (uti quidem tempus erat, cum ignoraretur Planetarum à fixis discrimen, & serò admodum à Pythagora siue Parmenide animadversum, eundem esse Vesperum & Luciferum; nec in Mose, Iob, aut Psalmis ulla mentio Planetarum) perpendat igitur, & quodammodò respiciat; quousque progressum sit in cognitione Naturæ, quantum restet; & quid porro expectandum sit hominibus.

Sed ad humiliores cogitationes redeamus; & quod cœptum absolvamus. Si enim quatuor Planetæ Iovem circumcursitant disparibus intervallis & temporibus: quaeritur cui bono, si nulli sunt in Iovis globo, qui admirandam hanc varietatē suis notent oculis? Nam quod nos in hac terra attineret, nescio quibus rationibus quis mihi persuadeat, ut illos nobis potissimum servire credam, qui illos nunquam conspiciamus; neque est expectandum, ut tuis Galilææ ocularibus universi instructi, illos porro vulgò observaturi simus.

Quo loco opportunè occurrendum duco etiam alij cuidam suspicioni. Erunt enim, quibus vana videatur astrologia nostra terrestris, seu ut philosophicè dicam, doctrina de aspectibus: cum numerum Planetarum aspectus facientium ad hanc usque diem ignoraverimus? Verum ij frustra sunt: astra enim in nos agunt iis modulis, quibus eorum motus se à his terris insinuant. Per aspectus enim agunt; at aspectus affectus est anguli in centro terræ vel oculi. Scilicet non ipsa in nos agunt, sed aspectus eorum sunt obiectum & stimulus fa-

cultatum terrestrium ratione participantium citra discursum, solo instinctu.

Iam verò quatuor hi, ut ex tuis Galilææ observationibus patet, & minimi sunt, & nūquam à Iove ultra 14. minuta digrediuntur: ut totus extimi Planetæ orbis minor sit disco Solis vel Lunæ. Quare ut dem, ipsos, non impediēte minutâ quantitate, concurrere per aspectus ad movendas facultates sublunares; non tamen ampliùs quid poterunt, quàm ut & ipsi quatuor, & Iupiter, centrum curriculum eorum, iunctum æquent (nec id crebrò) Solem, in diuturnitate nonnulla aspectus, ob diametri latitudinem.

Atq; hoc pacto manet astrologia suo loco; patetq; simul, quatuor hos novos non primariò nobis in Tellure versantibus, sed proculdubio Iovialibus creaturis, globum Iovis circumhabitantibus comparatos.

Id evidentiùs patet illi, qui tecum Galilææ, mecumq; Copernicum sequitur in Systemate mundano: videmus enim, in eo Lunam, circumterrestrem planetam, sic comparatam, ut non possit videri aliis globis, quàm soli Telluri. quam cursibus suis cingit, destinata. Eius curriculi diameter habetur pro vicesima parte diametri orbis magni Telluris circa Solē, Ego vix tricesimā existimo. Subrēdit igitur minus tribus, vel, ut ego, minus duobus gradib⁹, ex Sole inspectus. Ac cū Saturni altitudo sit decupla, Iovis quintupla circiter: ex Saturno igitur inspecta nostra luna non ultra 18. vel 12. minuta poterit à Tellure discedere, ex Iove ad 36. vel 24. minuta: quo pacto est eius ratio planè eadem Saturniis & Ioviis incolis, quæ planetarū circum-Iovialium nobis terrestrib⁹ creaturis. Nec abludit magnitudinis ratio, Esto enim, ut parallaxis Solis sit 3. minuta, etsi multo minorē esse putē: Terra igitur ex Sole inspecta habebit 6. minuta. Luna sesqui. Imò terra, multò minor, etiam Lunæ relinquet minus, nempe non unū minū.

minutum. Atq; hoc ex Saturno inspectū 6. fortè secunda videtur, ex Iove 12. secunda. Planè igitur sic est, quod nobis est in Tellure nostra Luna, hoc non est globis cæteris; & quod Iovi sunt illæ quatuor lunulæ, id non sunt nobis: & vicissim singulis planetarum globis, eorumq; incolis sui serviunt circulatorēs. Ex qua consideratione, de incolis Iovialibus summa probabilitate concludimus: quod quidem & Tychoni Braheo ex sola consideratione vastitatis illorum globorum æquè visum fuit.

Adeoq; & hoc argutissimè VVaackherius monuit; etiam Iovem circa suum volvi axem, ut nostram tellurem, ut ad illam convolutionem gyratio illa quatuor lunarum sequatur, uti ad nostræ Telluris gyrationem nostræ Lunę conversio in eandem plagam sequitur: adeoq; nunc demum se credere rationibus magneticis, quibus in nupero meo Physicæ cœlestis commētariō, volutione Solis circa axem & polos corporis, causas motuum planetariorum expediti.

Nimirum (ut tu Galilæe pulchrè inferis) si Iovem curriculo duodecim annorum occupatum, quatuor circulatorēs antepone cingunt; quid absurdi dixit Copernicus, Telluri, dū annuo motu redit, unā lunam eadē ratione adhærescere.

Quid igitur, inquires; si sunt in cælo globi, similes nostræ telluris, anne igitur cum illis in certamen venimus, utri meliorē mundi plagā teneant? Nam si nobiliores illorū globi, non suntus nos Creaturarum rationalium nobilissimę. Quomodo igitur omnia propter hominem? Quomodo nos domini operum Dei?

Difficile est nodum hunc expedire, eò quòd nondum omnia, quæ huc pertinent, explorata habemus; ut temeritatis notam vix effugituri simus, multa de hac quæstione differendo.

Non reticebo tamen, quæ mihi Philosophica videantur

argumenta adduci posse; quibus obtineatur non tantum in genere, ut supra; hoc Systema Planetarum, in quorum uno nos homines versamur, in præcipuo mundi sinu, circa Cor mundi, Solem nempe, versari; sed etiam in specie nos homines in eo globo versari, qui creaturæ rationali primariæ & nobilissimæ (ex corporeis) planè debetur.

Prioris affirmati de intimo sinu mundi, vide argumenta supra à multitudine fixarum, quæ pro muro hunc sinum certò vallant; & à claritate nostri Solis præ fixis. Quibus adde hoc tertium: quod mihi hisce diebus expressit V Vackherius, silentioq; consentire visus est.

Geometria vna & æterna est, in mente Dei refulgens: cuius consortium hominibus tributum inter causas est, cur homo sit imago Dei. In geometria verò figurarum à globo perfectissimum est genus, Corpora quinq; Euclidea. Ad horum verò normam & archetypum distributus est hic noster mundus planetarius. Da igitur, infinitos esse mundos alios: ij aut dissimiles erunt huius nostri, aut similes. Similes non dixeris. Nam cui bono infiniti, si unus quisq; in se perfectiorem omnem habet? Aliud enim est de creaturis generationis successione perennibus. Et Brunus ipse defensor infinitatis, censet, differre oportere singulos à reliquis totidem motuum generibus. Si motibus; ergo & intervallis; quæ pariunt motuum periodos. Si intervallis, ergo & figurarum ordine, genere, perfectione, ex quibus intervalla desumpta. Adeoq; si mundos invicem similes statueres per omnia, creaturas etiam feceris similes, & totidem Galilæos, nova sidera in novis mundis observantes, quot mundos. Id autem cui bono? Quin potius cavemus uno verbo, ne progressus fiat in infinitum, quod recipiunt Philosophi: cum assentiatur progressus versus minora finitus: cur non & versus maiora? Esto enim Sphæra fixarum; huius pars fortè ter milleesima Saturni Sphæ.

ni Sphæra, huius item decima pars Telluris Sphæra; Telluris porro tercēiesmillesima diametri. Homo, hominis tantula pars, cuniculus subcutaneus. Hic sistimus: nec progreditur natura ad minora. Pergamus igitur ad alterum membrū dilemmatis: sūt illi infiniti mūdi dissimiles nostri: aliis igitur quàm perfectis quinque figuris erūt exornati, ignobiliores igitur hoc nostro: unde conficitur, ut noster hic mundus sit illorum omnium, si plures essent, præstantissimus.

Dicamus iam etiam hoc, cur Tellus globo Iovio præster; digniorq; sit dominantis creaturæ sedes.

Sol quidem in centro mundi est, cor mundi est, fons lucis est, fons caloris, origo vitæ motusq; mundani est. At videtur homo æquo animo illo throno regio abstinere debere. Cælum cæli Domino, Soli iustitiæ, Terram autem dedit filiis hominum. Nam & si Deus corpus non habet nec habitaculo indiget; in Sole tamen (ut passim per scripturam in cælo) plus exerit virtutis, quàm mundus gubernatur, quàm in globis cæteris. Agnoscat igitur Homo ipsius etiam habitaculi sui distinctione suam indigentiam. Dei abundantiam; agnoscat se non esse fontem & originem ornatus mundani, sed à fonte & ab origine vera dependere. Adde & hoc, quod in Opticis dixi; cōtemplationis causa, ad quam homo factus, oculisq; ornatus & instructus est, non potuisse hominem in centro quiescere; sed oportere, ut navigio hoc Telluris, annuo motu circumspaciatur, lustrandi causa: non secus atq; mensores rerum inaccessarum, stationem statione permittant, ut triangulo mensorio iustam basin ex stationum intervallis concilient.

Post Solem autem, non est nobilior globus, aptiorq; homini quàm Tellus. Nam is primum numero medius est ex globis primariis (circulātoribus hīc, & Lunæ globo circumterrestri seposito, ut par est) habet enim supra, Martem, Io-

vem, Saturnum; infra complexum sui circuitus, currentes Venerem, Mercurium, & tornatum in medio Solem, cursu-um omnium incitatorem, verè Apollinem; qua voce Bru-nus crebrò utitur.

Deinde cùm quinque corpora abeant in duas classes, trium primariorum, Cubi Tetraedri Dodecaedri; duorum secundariorum Icosaedri & Octaedri: telluris circuitus sic inter utrumque ordinem, veluti maceries intercedit, ut superiùs dodecaedri centra planorum duodecim, inferiùs respondentis Icosaedri angulos duodecim stringat: quo vel solo situ inter figuras, præ cæteris orbibus notabilis est orbis Telluris.

Tertiò nos in Tellure Mercurium, planetarum primario-rum ultimum, vix visu apprehendimus, propter propinquam & nimiam Solis claritatem. Quantò minùs in Iove vel Sa-turno, Mercurius conspicuus erit? Summo itaq; consilio hic globus homini videtur attributus, ut omnes planetas con-templari posset. Adeoq; quis negabit, in compensationem latentium apud Ioviales, planetarum eorum, quos nos Terri-colæ videmus; attributos esse Iovi quatuor alios, ad nume-rum quatuor inferiorum, Martis, Telluris, Veneris, Mercu-rij, Solem ambientium intra Iovis ambitum?

Habeant igitur creaturæ Ioviæ quo se oblectent; sint illis etiam, si placet, quatuor sui planetæ dispositi ad normam classis trium rhombicorum corporum; quorum unum (quasi rhombicum) cubus ipse est, secundum Cuboctaedricum, ter-tium Icosidodecaedricum, sex, duodecim, triginta plano-rum quadrilaterorum: habeant inquam illi sua: nos Homi-nes Terricolæ non utiq; frustra (me doctore) de præstan-tissima nostrorū corporum habitatione gloriari possumus, Deoq; conditori grates debemus.

Hæc super novis dubitationibus, quas tuis Galilææ expe-rimētis excitasti, philosophicè tecum differere mihi placuit,

Sed

Sed cum sapius iam structuram mundi per quinque regularia corpora, ex meo mysterio Cosmographico adduxerim, tribus verbis obiectionem initio epistolæ tactam, penitus eliminabo.

Cum quatuor hi planetæ angustissimis meatibus Iovem ipsum circumambulent; nemo metuat, turbatum iis iri rationem meam interpositionis figurarum Pythagoræ inter planetas. Quin potius spero hos circulatores Iovios, et si quos habent alij etiam planetæ, tandem omnem quæ restat, discrepantiam sublaturus. Rationem enim à Deo etiam horum circulatorum habitam in figurarum interpositione, circulator terræ, Luna scilicet arguit, cuius circuitum circa terram negligere non potui, cum illud negotium seriò tractarem.

Adcoque etiamnum in restitutione orbium & motuum Martis, Telluris, Veneris, ex observationibus Brahei, deprehendo, hiare plusculum interstitia, ut Dodecaedri angulis, à Perihelio Martis extensis, non assequatur centra planorum, Lunam in Apogæo suo & Aphelio Telluris constitutam; neque centra Icosaedri Aphelio Veneris accommodata porrigant angulos Icosaedri usque ad Lunam in Apogæo suo & Perihelio Telluris constitutam: quod argumento est, superesse aliquid loci inter Perihelium Martis & angulos Dodecaedri; sic inter centra Icosaedri & Aphelium Veneris; & quod miraculo esse possit, paulò plus illic, quàm hic: quibus ego spaciolis spero me Lunas circum-Martiales & circum-Venerias, si quas Galilæe olim deprehensurus es, faciliè locaturum.

Tecum Galilæe incepti, tecum finem faciam. Miraris non frustrà: cur tanto discrimine magnitudinis Medicea sidera suas mutant facies. Causas, quas comminisci quis

posset, tres reiciis argutè & mathematicè. Ponis unam physicam ut possibilem: de qua tempus docebit. Occurrit verò mihi ista: si quatuor hi planetæ, disci forma plano ad Iovem converso circumeant, ut ad excursus maximos nobis & Soli obiciantur ut Lineæ, supra & infra irradiantur perpendiculariter, videanturq; magni, & fortè diversicolores sint, pro diversitate planicierum. Sufficiat monuisse.

Quod superest, vehementer abs te peto Galilæe celeberrime, ut in observando strenuè pergas, quæq; observando fueris affecutus, nobis primo quoq; tempore communices, deniq; prolixitatem hanc meam, dicendiq; de Natura li-

bertatem boni consulas. Vale. Pra-

gæ 19. April. 1610.

